

TATA IBADAH

**Minggu Pelayanan Hubani Na Mabalu, Lansia,
Na Tading Maetek Pakon Difabel**

GKPS PADANG BULAN



23 AGUSTUS 2020

Tema:

“Ibohali Manghobaskon Horja na Madear” (2 Timoteus 3:17)

Subtema:

**“Pasirsir ma Kuria in gabe Sipambobai na Toruh Maruhur,
Sihabiari Naibata, Sibalosi Ajar, ibagas Biak na Madear,
ase Lambin Tarbarita Goran ni Kristus”**

(Mateus 5:18-19, Markus 9:35)

I. KEBAKTIAN

1. Votum-Introitus-Tonggo

P : Riap ma hita jongjong!

Ibagas goran ni Naibata Bapa, pakon Tuhan Jesus Kristus ampa Tonduy Na Pansing, Sitompa langit pakon tanoh on. Amen

Ise ma hasomanku i nagori atas? Sobali Ham seng dong iharosuhkon uhurhu i tanoh. Age pe lambin melus badanku pakon uhurhu, batar-batar bani uhurhu ampa rupeihu, aima Naibata sadokahni dokahni. Haleluya!

K : (*Mandodingkon Haleluya No. 303:1*)

Na Pansing, Na Pansing, Tuhan parkuasa

Ari on hanami mamuji Naibata

Na Pansing, Na Pansing janang marjumbalang

Sitolusada na sangap tumang

P : Martonggo ma hita!

Ham Tuhan Naibata parholong ni atei banggal. Ham do harohan ni apoh-apoh na tarsulur bani halak na marpusok ni uhur, ampa hagogohon na sumurung bani halak na ibagas hagalekon. Iramoti Ham do hanami haganup kuria-Mu, na marlungun ni uhur halani mabalu, na hurang margogoh ibahen hatuahon ni angkula, na lungunan halani girah tading maetek sonai age na difabel. Haganup do hanami arga i lobei-lobei-Mu. Tatap Ham hanami na martumpu on, ase malas uhurnami janah margogoh mandompakkon bagei ni hamaholon ampa na masa panorang on. Tangihon Ham ma pangindoannami on, Ham Tuhan sipangapoh, haporusan, parbansahan pakon batar-batar na toguh marhitei Jesus Kristus Tuhannami. Amen.

2. Mandoding Haleluya No. 201: 1+ 4+ 5

Puji tongtong Jahowa tongon

pardear gabei parholong atei sadokahni in;

pardear gabei in parholong atei in.

Jombut botul Jahowa bujur.

Na marmulia bai haganup na tinompa-Ni in.

Hamuliaon ma bai Tuhan Naibata!

Sombah bujur Jahowa botul.

Marhahormaton ma hita bai Tuhanta Naibata.

Sai rap marsombah ma bai Tuhan Naibata.

3. Tonggo Mangindo Hasasapan ni Dousa

P : Riap ma hita jongjong!

Martonggo ma hita, sopotkon hita ma dousanta hubani Tuhan Naibata.

Ham Tuhan Naibata, pargogoh na so tarimbang. Ham do bona ni haganup pasu-pasu na gokan dear. Ihaporsayai hanami, Naibata na bayak do Ham anjaha na sirsir manguseihon bagei ni pasu-pasu pardagingon ampa partonduyon hubani jolma. Domma ijalo hanami pasu-pasu-Mu in marhitei horja na hinorjahan ni tangannami. I tongah-tongahnami buei do halak na marhahurangan bani haporluan ni goluh, bani sipanganon, bani pambotoh, na madoyuk anjaha masombuh. Bani hasombuhon pakon hadoyukon in, hotop do lang ipataridahkon hanami goluh ha-Kristenon.

K : (Mandodingkon Haleluya No. 384:1)

Anggo sai tong hupingkiri, pambahenankin

Simbei do tong ganup tingki, seng margagan in

Holong-Mu, Tuhan pangajamankin sai marpangulaki, Ham mangidah in

Holong-Mu, Tuhan pangarapankin seng dong parsuhutan, pitah Ham do in

P : Lang sari hanami hubani halak na marhahurangan. Sipata rahanan do iparambur-ambur hanami sinadongannami marimbang mamberehkon ai hubani halak na marhahurangan. Ra do homa itutup hanami panonggornami dompak halak na marhahurangan .

K : (Mandodingkon Haleluya No. 384:2)

Gijang uhur ampa latei, seng maronti in

Uhur domdom ganup ari, sai na roh do in

Holongmu, Tuhan pangajamankin sai marpangulaki, Ham mangidah in

Holongmu, Tuhan pangajamankin seng dong parsuhutan, pitah Ham do in

P : Nuan iakui hanami do haganup dousanami in, halani ai roh do hanami hu lobei-Mu mansopothon dousa pakon hahurangannami. Ham Tuhan, marpangulaki ma uhur-Mu mangidah haganup hahurangannami in. Idop ma uhur-Mu, sasap Ham ma dousanami, ibagas goran ni Anak-Mu Jesus Kristus Tuhan anjaha Sipaluah hanami. Amen.

Tangar anjaha haporsayai hita ma Hata ni Naibata, bagah-bagah pasal hasasapan ni dousa.

Anggo marparlahou hita ibagas haliharon, songon Ia ibagas na lihar in, saor do hita samah hita, anjaha ipaborish daroh ni Jesus, Anak-Ni in do hita humbani sagala dousa.

Ibagas holong ni Naibata, domma isasap haganup dousanta. Halani ai, pataridahkon hita ma tanda-tanda ni pargoluhon na bayu. Hasangapon ma bani Naibata i babou.

K : Amen

4. Mandoding Haleluya No. 130: 1, 4

Ai domma jumpah au ondolan ni tonduyhin na magou on
Daroh ni Jesus do manahan sadokah ni dokah ni in.
Maseda pe dunia on, tongtong togap ondolan on.

Domma mogap ganup dousanta bai darohni Tuhanta in.
Ai anggo porsaya do hita seng bulih hona uhum in.
Ibaen hata ni daroh in na mangkahui jolma in.

5. Hata Haporsayaon

P : Riap ma hita jongjong! Saksihon hita ma haporsayaonta in songon na sinaksihon ni ganup halak na porsaya bani sab tanoh on!

P+K: Ahu porsaya bani Naibata Bapa, Pargogoh na so tarimbang, na manompa langit pakon tanoh on. Ahu porsaya bani Jesus Kristus, Anak ni Naibata na sasada in, in do Tuhanta, na tinubuhkon ni si Maria sanggah nape haliaban, marhitei tonduy na pansing. Na manaron na parngit, bani panorang ni si Pontius Latus, iparsilangkon, matei anjaha itanom, turun hu nagori toruh. Mulak manggoluh humbani na matei bani ari patoluhen. Naik hu surga anjaha hundul i siamun ni Naibata Bapa, pargogoh na so tarimbang in. Hunjai ma Ia mulak magira laho manguhumi halak na manggoluh age na dob matei. Ahu porsaya bani tonduy na pansing, bani kuria parsadaan na mapansing in, paraoran ni sagala na mapansing in, bani hasasapan no dousa, bani parpuhoon ni angkula, pakon bani hagoluhan na sadokah ni dokahni. Amen. Amen

(Hundul Kuria)

6. Acara Pelantikan Pengurus Seksi-Seksi Resort Polonia

7. Mandoding Haleluya No. 446:1-2

Sisada angkula do hita ganupan, ragam ni pagori do hita tongon
Na sombuhan bayak dos do in bani Tuhan seng dong ilioi isarikhon do tong
Tuhanta do na gabe Hayu anggur, rantingni do hita on hajojor
Jolom ma Jesus ulang ham pandur, ase tabun marbuah na ramos

Tanda ni sisada angkula do hita, rap marpangarapan bani goluh on
Nai do bani horja rap marsiurupan, ulang dong na marsidalian ijin
Tuhanta do na gabe hayu anggur, rantingni do hita on hajojor
Jolom ma Jesus ulang ham pandur, ase tabun marbuah na ramos

8. Refleksi

Secara umum tarbarita do masyarakat Simalungun memiliki sada tradisi na dear tumang, aima manggoluh ibagas na bergotong-royong. Sikap janah sifat na sonai ai taridah marhitei horja "Haroan Bolon" pakon sada falsafah goluh na sinobut "Sapangambei manoktok hitei". Bani piga-piga ianan atap huta boi pe jumpah hita hal

on marhitei piga-piga halak riap na marharoan bani sada juma. Sada huta riap paborsihkon dalan hu huta, pakon na legan. Bani bentuk na legan, ibahen do Serikat Tolong Menolong (STM) ni sada huta, STM ni kuria bahkan STM ni parhorja. Buei do na tarurupi marhiteihon ni horja sisonon tarlobih bani panorang pusok ni uhur atap malas ni uhur. Usih songon na tarsurat bani Heber 10:24 :" Pardiateihon hita ma samah hita, ase marsiojuran hita mandalankon holong ampa horja na madear". Mampardiateihon hasoman aima tanda ni makhluk sosial do hita, na lang boi hidup sendiri. Deba do boi tarhorjahon hita sandiri marhitei hapentaran, gogoh, pakon kuasa jabatan na adong banta, lobih ni ai ihaporluhon hita do pangurupion ni hasoman.

Halani ai saling marsidukungan, marsiurupan, mampardiateihon pakon manonggohan aima gabe gaya hidup na lang boi ganggang humbani goluhta. Anggo adong na galek, hita na margogoh ma na manogu. Anggo dong na pusukan uhur atap halani aha pe, sirsir ma hita mambere apoh-apoh, ase riap marpangarapan hita bani goluh on. Riap manatap ma hita hu lobei, haporsayai hita ma, ibagas ranggian ni Naibata do goluhta. Panean do hita bani hadearon na humbani Naibata. Magou ma hagobiron bani na mabalu, na tading maetek, na lang marbapa pakon na lang marinang, na dob matua angkulani age na difabel pe. Lang adong habiaran age dob matua daging, age pe isobut na dob matua aima kelompok na rentan hona naborit. Manjaga kesehatan diri sandiri janah marondos hubani panramotion ni Tuhan, ai do na parrohkon semangat na gabe tambar bani goluhta. Songon na sinobut bani Jesaya 46:4 "Das bani hatuaonnima totap do tong Ahu, ronsi na ubanon hanima, Ahu do tong mangombah hanima. Ahu do na dob mambahen ai, anjaha Ahu ma na mangusung anjaha au ma na paluahkon". Parsimada do hita ganup bani hata ni Tuhan in, iramotkon, ihasomani janah maharga tumang do goluhta Bani. Halani ai puji hita ma Tuhan, ai totap do holong-Ni ronsi sadokah ni dokahni. Goluh na marsidukungan, marsiurupan, mampardiateihon pakon manonggohan, in ma buah ni na dob tarpasu-pasu tongon goluhta. Sahali nari, surung do gogoh ibere Tuhan bani na tading maetek anjaha buei do homa pasu-pasu hubani na mabalu, totap do panramotion ni Tuhan bani na matua. Ipatalar Tuhan in do homa hasangapon-Ni hubani na difabel, sonai ganup kuria na martenger ni uhur bani Jahowa. Amen.

9. Mandoding Haleluya No. 352:1+4

Ai halongan do hape, holong ni Tuhan in
Itobus Kristus au hape pardousa na doyuk.
Tapi hubotoh janah porsaya, bani gogoh-Ni pakon kuasa-Ni,
Ai iparorot do tong goluhku, das bai parujungan in.

Ganupan pardalakin, rusia do tongtong,
Paima jumpah ajalhin, mangidah bohi-Mu.
Tapi hubotoh janah porsaya, bani gogoh-Ni pakon kuasa-Ni,
Ai iparorot do tong goluhku, das bai parujungan in.

10. Acara Khusus

- ❖ Mambasa Tonah ni Pimpinan Pusat GKPS
- ❖ Tingting + Tonggo Pangapition

11. Mandoding Haleluya No. 490:1-2

Sonang rapkon Jesus in, rapkon Jesus tongtong, rapkon Jesus tongtong,
Ia Panondang bai na golap in, Rap Jesus daoh biar ijin.
Baritahan Jesus in, pakon hasintonganNin,
Janah ulang mabiar ham ijin.

Sai ambilankon ma in, ambilankon ma in, ambilankon ma in.
Hasintongan-Ni sahapkon ma in, rap Jesus daoh biar ijin.
Ambilankon Jesus in pakon ganup Hata-Nin,
Janah ulang mabiar ham ijin.

12. Ambilan: 1 Korint 6: 12-20

13. Galangan

Parambilan : Paima iondoskon hita galanganta, tangar hita ma lobei hata ni Naibata na gabe onjolan banta laho manggalang, aimna na tarsurat bani: Psalmen 116:17-18: "Bamu ma galangkononku galangan puji-pujian, anjaha goran ni Jahowa ma padilo-diloonku. Bagah-bagahku bani Jahowa, hugalari ma, hugalari ma i lobei ni haganup bangsa-Ni". Sonari ondoskon hita ma galanganta!

P+K: mandodingkon "*Ijon Adong Hu Boban Tuhan*"

Ijon Adong Huboban Tuhan

*Ijon adong huboban Tuhan limbuah ni horjangku lang targorani in
Sadiha ma arga ni Tuhan anggo sai na pikirin ganup layakMu in
Jalo ma Tuhan megah ma uhur-Mu, jalo ma Tuhan megah ma uhur-Mu

Tanganku na galek do Tuhan na lang ongga mansari do pe au on nuan
Uhurhu ma hu bere Tuhan na gabe galanganku pamalas uhur-Mu
Jalo ma Tuhan megah ma uhur-Mu, jalo ma Tuhan megah ma uhur-Mu

Hu dingat do tonah-Mu Tuhan maningon do jaga on dakdanak na etek
Tampeihon Ham tangan-Mu Tuhan bai simanjungnami paruhur na galek
Jalo ma Tuhan megah ma uhur-Mu, jalo ma Tuhan megah ma uhur-Mu*

14. Tonggo & Doding Galangan-Tonggo Panutup Paingkatkon-Pasu-Pasu

P : Riap ma hita jongjong!

Martonggo ma hita mangondoskon galanganta hubani Naibata!

Ham Tuhan Naibata, Bapanami, pardear layak janah na unjah hu bannami. Tarima kasih ma hatahononnamu hu Bamu, halani tongtong do ipasu-pasu Ham goluhnamu. Domma ihasomani Ham hanami janah ipasu-pasu Ham horjanami das hubani sadari on. Sonari, ibagas malas ni uhur roh do hanami mangondoskon buah ni horja na dob pinasu-pasu-Mu in gabe galangan hatarimakasihon pakon puji-pujiannam mu Bamu. On pe sai jalo Ham ma galangannam on, bahan hasangapon ni goran-Mu janah mambahen lambin marhataridahan harajaon-Mu i dunia on. Ibagas goran ni Anak-Mu, Jesus Kristus Tuhan namu, jalo Ham ma tonggonam on. Amen.

P+K : (*Mandoding Haleluya No. 249:2*)

Ganup binereMu in, tonduy pakon angkulangku

Hosah ampa gogohkin, ronsi haganup artangku

Huondoskon in Bamu, seng paosorонку in

P : Ham Bapanami na i nagori atas. Sai na papansing ma goran-Mu! Sai roh ma harajaon-Mu. Sai saud ma harosuh ni uhur-Mu i nagori tongah on songon na i nagori atas! Bere Ham ma bannami sadari on hagoluhan ari-ari. Sasap Ham ma dousanami songon panasapnami bani dousa ni hasoman na mardousa dompak hanami! Ulang hanami bobai Ham hu parlajouan! Paluah Ham ma hanami hun bani pangagou!

K : (*Mandodingkon*) *Ai Ham do simada harajaon, pakon hagogohon
ampa hasangapon sadokah ni dokahni.*

P : Laho ma nasiam, janah, "Hupabangkit do hanima, ase laho hanima marbuah, anjaha ase totap buahnima ai, ase ibere bannima sagala sipindoonnima humbani Bapa in marhitei goran-Ku" (Johanes 15:16)

Jalo nasiam (*hita*) ma pasu-pasu humbani Tuhan Naibata:

Ipasu- pasu anjaha iparorot Tuhan Naibata ma ham (hita).

Isondangkon Tuhan Naibata ma bohini hu bamu (hu banta).

Janah maidop ma uhur-Ni mangidah ham (hita).

Idompakhon Tuhan Naibata ma bohi-Ni hu bamu (hu banta).

Janah ipasorap ma damei-Ni bani tonduytu bei). Amen

K : (*Mandodingkon*) Amen... Amen... Amen